

Pawakuy nu apaw

Suwal sa kiya wina i takuwan, mahaen i saw Lisin kiya sakatawaan sananay a demak nu maku. Natayra kaku i viyaw nu mita a mihulul, tumian, malelaw nu maku tu nipisanga' nu heni tu pawakuy nu apaw. Saayaway rusrus han nu heni, herek sa pawali han tu cidal a milicang. Dudu sa iri merec han a palaavulen, siwasiw han tu kiya avul nu apaw. Tuwa mitemi han a pawaneng, tu hacacacay han a mikamel a misakaliti. Palalavu' han tu rihum, salikulay tavu hantu tu papah nu lalengac, pacumud han i langseng a mirahekad.

Macacak satu kiya pawakuy nu apaw, caay kaidi a pakaen i takuwan ci viyaw. Sulinay, alesu' a kaenen nu maku, nasa:an taluma' tu kaku.

Masimsim nu maku, ira kiya nipaluma niyam i umah tu apaw, talaumah vangad han nu maku a pataluma' kiya apaw, a misanga' tiya pawakuy. Anu maanen ni viyaw a misanga', haenen tu nu maku yari a misanga' tu a micacak. Macacak satu kiya pawakuy nu apaw, ala tu cacay tanu'ulah sa a kemaen tu nakamayan nu tireng. Araw mawarak kaku yari, ka u adi:di' mapatay isaw. Kana adihay ku nikaen nu maku ka u maamaanay tu hakiya?

Mahaen isaw kira demak nu maku, tada u medamedac nina nguyus satu

a micihi kaku i takuwan. Namahaen tu aca caay kaenun ku valucu' nira, tayra aca i viyaw a mipalita a misapinang tu sapisanga' tiya pawakuy a demakan. Nasa:an simsim sa kaku, araw caay ka u melaw a cacay ku sakavana' tu maamaan a demak satu kaku. Sulinay mavana' tu kaku a misanga' tu pawakuy nu apaw.

Nasaan tayra hen a milisu' tu i Dawlikay a laluma'an sa kaku, tangasa kaku suwal sa kiya laluma'an. Kapah anini a mihca ku langaw niya heci nu apaw, madengay tu a sanga'en nu mita tu pawakuy nu apaw satu. Sisa, anu tayra tu kaku, caay kanca makumud tu kami a misanga' tu pawakuy nu apaw. Nika, caay tu kami palalavu tu rihum, u vataan tu ku sapalalavu tira pawakuyan. Mangalev ku nikaalesu', nikavangsis a kaenen.

Sulinay namakayniay kiyari ku sakavana' ni ina tu tu'ud a demakan, nasaan yu mimaamaantu kaku. Caay kanca pitulun i takuwan, suwal sa cira u demak hananay anu adidik aca ku nipatelac. Caayay tu kasilaheci saan, sisa, piarawi haw! Pasameteki haw satu cira a pasevana' i takuwan.

木薯糕

媽媽有一件事跟我分享。她到鄰居家聊天，看見她們忙著製作木薯糕，就好奇的觀看，沒多久，木薯糕蒸煮完成，她們讓我一起品嚐木薯糕，回家後，我立刻把田裡的木薯採收，如法泡製蒸熟木薯，非常高興的吃了一個自己親手做的木薯糕，吃了之後，頭昏眼花，呼吸困難，幸好只吃一個，不然後果不堪設想。她仍然不放棄，繼續請教鄰居，不但會做，還變出多種口味。因為這件事，媽媽再三叮嚀我，做任何事情不可看表面，要更深入理解。